

Esikoulu oon sinun lapsele

ESITE ESIKOULUN OPETUSPLAANISTA



Skolverket



Sie olet tärkeä

Sie olet lähimpänä sinun lasta. Sen takia sinun mielipheet on tärkeitä esikoulussa. Jos sie sanot mitä mieltä sie olet, pärsunaalila on helpompi antaa sinun lapsele juuri sitä mitä se tarttee. Ennenkö saatat olla matkassa vaikuttamassa, sinun tarttee tietää miten esikoulun pittää toimia.

Samoja tavohteita kohi

Hallitus on lyöny lukhuun opetusplaanin jossa kirjojethaan esikoulun arvopohjasta ja kans mitä tavohteita ja tehtäviä esikoulula on. Lukemalla esikoulun opetusplaanin, sie saat tietää mitä sie voit oottaa ja vaatia esikoululta.

Oon olemassa kunnalisia esikouluja ja vaphaita esikouluja. Kunnalisista esikouluista vastaa poliittisesti valittu lautakunta. Vapaa-esikouluitten vastuu on niitten johtokunnala. Kaikki esikoulut häätyvät seurata opetusplaania.

Usseimiten esikouhluun kuuluvat 1–6 vuotihaat lapset. Kaikila 3–6-vuotisilla lapsila on oikeus ilmasheen esikouhluun 525 tiimaa vuessa.



» Esikoulussa lapsitten pittää kohata raahvaita jotka ottavat jokhaisen lapsen maholisuuat huomihoon.«

ESIKOULUN OPETUSPLAANISTA, LPFÖ 98 (KORJATTU 2010)



Askel kerralhaan elämänpitusessa oppimisessa

Esikoulun pohja pittää olla temokraattinen. Isoksi osaki se oon kyse siittä ette pärsunaali luopi avomen ja temokraattisen ilmapiirin jossa jokhainen lapsi tuntee oman ja muitten arvon.

Esikoulun toiminan petakokiikka pittää olla semmonen ette huolto, hoitaminen, kasvatust ja opettaminen muostavat kokohnaisuuen. Se tarkottaa ette esikoulu ensikäessä oon sinun lapsen vuoksi, vaikka sen pittää kans antaa sulle maholisuuuen opiskella eli olla töissä.



Opetusplaanissa on ette leikki on tärkeä lapsen kehityksele ja oppimisele. Pärsunaalin pittää ottaa huomihoon lapsen omat mielipitheet, intressit ja kokemukset ko jokapäivästä työtä planerathan. Lapsitten pittää saa kokkeila eri sortin ilmasuja, niin yksin ko muitten kansa, esimerkiksi laulun ja musiikin, kuvitten, tansin, draaman, puhumisen ja kirjottamisen kautta.

Lapsen pittää saa maholisuen kehittää ommaa kulttuuri-itenttitettä. Lapsitten kieli-kehitys on tärkeä ala esikoulussa. Esikoulun pittää myötävaikuttaa siihen ette lapset joila on joku muu äitinkieli ko ruotti, saavat maholisuen kehittää niin ruottin kieltä ko ommaa äitinkieltä.

Esikoulun pittää vastustaa perintheisiä sukupuolimyösteriä ja sukupuolirollia. Kaikile tyttärille ja poile pittää antaa samat maholisuuat kehittyä ilman rajoituksia.



Joka esikoulu on ainutlaatunen

Opetusplaani pitää varmistaa ette kaikki lapset saavat yhtä hyvän esikoulun, huolimatta siitä missä he asuvat. Koska kaikki esikoulut seuraavat samaa opetusplaania, niillä on kans samat tavoitteet. Siinä miten työ tehdään saattaa kyllä olla eroja. Se mikä passaa yhdelle esikoululle, ei piiaim toimi toisella. Toiminnan pitää anpassata lapsitten mukhaan.

Kunnala eli vapaakoulun johtokunnala on viiminen vastuu esikoulusta. Saatat kääntyä sinne, jos tullee prupleemia joita sie ja pärsunaali eli esikoulun johtaja itte että saata selvittää.

» Esikoulun pitää inspireerata lapsia tutkimhaan lähiympäristöä.«

ESIKOULUN OPETUSPLAANISTA, LPFÖ 98 (KORJATTU 2010)





Yhtheistyötä kotitten kans

Opetusplaanissa on ette esikoulun toiminta pittää tapahtua lähheisessä ja luottamukselisessa yhtheistyössä kotitten kans. Sen takia onki tärkeä ette sie puhut pärsunaalin kans jos sie mietit jotaki asiaa. Hyvä tilasuus siihen on ko nouat eli jätät lapsen. Sillon pärsunaalin pittää selittää sulle minkälainen päivä sinun lapsela on ollu. Sie saatat kans kertoa jos on tapahtunnu jotaki erikoista josta pärsunaalila on hyvä tietää.

Pärsunaali pittää oornata kehityskeskusteluja jossa tet keskusteletta siittä mitenkä sinun lapsi triivastuu ja kehittyj ja mitenkä esikoulu toimii. Opetusplaani pittää olla tuki tälle keskustelule.

» Esikoulun pittää olla hauska, turvalinen ja opettava kaikile lapsile jokka on myötä.«

ESIKOULUN OPETUSPLAANISTA, LPFÖ 98 (KORJATTU 2010)



Halvatkos lukea koko opetusplaenin?

Opetusplaani oon kaikila esikouluila. Sie saatat tilata eli hakea sen omhaan taattorhiin Koululaitoksen webbpaikalta www.skolverket.se.

ISBN 978-91-87115-15-8

Grafisk form: AB Typoform

Omslagsfoto: Maskot

Foto inlaga: s 2 NordicPhotos, s 3 Kzenon/Shutterstock,

s 4 Yulya Shilova/Shutterstock, s 5 Michael McLain, s 6 NordicPhotos

Skolverket 2011

Skolverket